



REPUBLIKA E KOSOVËS

KUVENDI I KOMUNËS-VUSHTRRI

PROCESVERBAL
NGA MBLEDHJA E –VIII- E RREGULLT E KUVENDIT TË KOMUNËS SË
VUSHTRRISË, MBAJTUR MË 27 TETOR 2022

Mbledhja është mbajtur në sallën e Kuvendit të Komunës së Vushtrrisë, duke filluar në orën 10:20. Në këtë mbledhje ishin të pranishëm anëtarët e Kuvendit të Komunës së Vushtrrisë: Adnan Lahu, Agim Bregaj, Agron Përçuku, Alban Bajrami, Ali Januzi, Arlind Gogolli, Behar Duraku, Bekim Zabërgja, Blerina Shala, Bujar Pllana, Edona Gashi, Fakte Dushi, Faton Hyseni, Fatmire Cecelia, Gentiana Rama, Gresa Muli, Ilmi Azemi, Kushtrim Hyseni, Leonora Gërguri, Lorik Maxhuni, Mek Selaci, Melihate Basholli-Latifi, Mentor Hasani, Mensur Kasumi, Nurie Halili, Nasuf Aliu, Nurten Çerkezi-Gjyshinca, Shkelzen Xhaferi, Sylejman Mehulli, Spasoje Stefanoviq, Ymer Haradinaj dhe Zojë Hajrizi.

Munguan: Galip Avdiu, Mensur Kastrati dhe Refik Maloku.

Mbledhjen e hapi dhe e kryesoi Melihate Basholli-Latifi, – kryesuese e kuvendit, e cila konstatoi se në sallën e kuvendit, ka kuorum të mjaftueshëm për zhvillimin e punimeve të mbledhjes plenare dhe për marrje të vendimeve të plotfuqishme, andaj procedoi me rendin e ditës. Të pranishëm në këtë mbledhje ishin edhe nënkryetari i komunës z. Shpëtim Zhegrova, përfaqësuesi i KFOR-it, përfaqësuesi i OSBE-së, përfaqësues të mediave të shkruara dhe elektronike, përfaqësues të shoqërisë civile.

Sylejman Mehulli, anëtar i kuvendit - propozoi që deri në seancën e muajit të ardhshëm, të analizoni aspektin legjislativ dhe të përgatitni propozimet për themelimin e komiteteve tjera të kuvendit me përbërje nga anëtarët e kuvendit, ashtu siç e parasheh ligji dhe siç e kanë praktikë komunat tjera. Bazuar në ligj si një praktikë e mirë dhe si një mundësi që secili kuvendar të jep kontributin e tij profesional dhe të ndihen pjesë e rëndësishme e përfaqësimit qytetar. Ai lexoi pjesën përkatëse të legjislacionit në fuqi, që buron nga Ligji për Vetëqeverisje Lokale duke shtuar që përveç KPF-së dhe Komitetit për Komunitete, kuvendi mund të themelojë edhe komitete tjera sipas nevojës, e që mund të jenë komiteti për shërbime publike, për arsim, për shëndetësi e të ngjashme.

Melihate Basholli-Latifi, kryesuese e kuvendit – tha se deri në seancën e ardhshme do të konsultohemi me shefat e grupeve kuvendare për themelimin e këtyre komiteteve.

Ilmi Azemi, anëtar i kuvendit - tha se përkrahi parafolësin por sqaroi se disa komitete janë të formuara, kurse dy prej tyre paguhen, të tjerat jo dhe duhet të shikohet rregullorja e pagesave, kështu që propozoi që për seancën e radhës të përgatitet Rregullorja për pagesën e komiteteve.

Sylejman Meholli, anëtar i kuvendit - tha se sipas ligjit komitetet në fjalë paguhen sikurse komitetet e përhershme dhe vetëm duhet të shikohet mundësia buxhetore. Por sipas tij Komuna e Vushtrrisë i ka mundësitë për pagesën e këtyre komiteteve.

Ilmi Azemi, anëtar i kuvendit – tha se sipas ligjit në fuqi paguhen vetëm dy komitetet e përhershme, ndërsa tjerat jo dhe na mbetet ta aprovojmë rregulloren për pagesën e këtyre komiteteve.

Leonora Gërguri, anëtare e kuvendit – kërkoi nga qeveria komunale të merret me trajtimin e qenve endacakë, pasi paraqesin shqetësim, veçanërisht për fëmijët që shkojnë në shkollë.

Edona Gashi, anëtare e kuvendit – kërkoi që pika e pestë e rendit të ditës të hiqet nga shqyrtimi pasi që nuk është përgatitur si duhet.

Shpëtim Zhegrova, nënkryetar i komunës – tha se pajtohet me dy parafolësit Sylejmanin dhe Ilmiun për formimin e këtyre komiteteve konsultative pasi ato ekzistojnë edhe në komuna tjera. Tutje ai propozoi të futet në rend të ditës formimi i komisionit për përgatitjen e rregullores deri në fund të vitit për të startuar në vitin e ardhshëm. Ai kërkoi që pika e 7 e rendit të ditës “Shqyrtimi i Raportit të menaxhimit të performancës dhe grantit të bazuar në performancë për vitin 2021”, të largohet nga rendi i ditës, pasi referuesi i kësaj pike të rendit të ditës, Islam Latifi ndodhet jashtë vendit për punë zyrtare të komunës.

Edona Gashi, anëtare e kuvendit – shprehi shqetësimin lidhur me informatën për punën e Këshillit Komunal për Siguri në Bashkësi për gjashtëmujorin e parë të vitit 2022, ku kjo informatë i referohet gjashtëmujorit të parë janar-qershor të vitit 2022, kurse brenda tekstit diskutohet për punën e ish kryetarit Xhafer Tahri për 2021. Ajo propozoi të korrigohej kjo pjesë duke dyshuar që këto mbledhje nuk janë mbajtur fare dhe kërkoi të largohet nga rendi i ditës dhe të sjellët në seancën e ardhshme.

Ymer Haradinaj, anëtar i kuvendit – tha, më datë 28 korrik të vitit 2022, kuvendi ka themeluar komisionin për përzgjedhjen e këshillave lokale me përbërje të: Blerina Shala, Bekim Zabërgja, Agron Perçuku, Ymer Haradinaj (anëtarë të kuvendit), Qemajl Hasani (anëtar i ekzekutivit), Isak Hyseni (shoqëria civile) dhe një anëtar nga fshati apo lagjja. Tutje tha se në bazë të Rregullores për formimin e këtyre këshillave është dashur të formohet edhe komisioni për ankesa, i cili do të shqyrtonte ankesat lidhur me zgjedhjet e këshillave lokale. Prandaj propozoi që të bëhet plotësim-ndryshimi i atij vendimi dhe të themelohet komisioni i ankesave.

Shpëtim Zhegrova, nënkryetar i komunës - tha se në rregulloren e cila do të përgatitet për pagesën e komiteteve do të futet edhe pagesa e komisioneve komunale.

Ilmi Azemi, anëtar i kuvendit - lidhur me formonin e komisionin e ankesave tha se duhet të formohet vendim i veçantë e jo ndryshim i vendimit për formimin e këshillave lokale.

Behar Duraku, anëtar i kuvendit – tha se neve si anëtarë të kuvendit na ka ardhur një email nga klubi i futsallit F.C. Vushtria për financim të klubit dhe kërkoi të futet në rend të ditës kjo kërkesë.

Shpëtim Zhegrova, nënkryetar i komunës - në bazë të ligjit në fuqi Kryetari i komunës ka marrë vendim për përkrahjen e klubit në fjalë.

Melihate Basholli-Latifi, kryesuese e kuvendit – shtoi se pasi ishin dy propozime për largimin e dy pikave të rendit të ditës nga rendi i ditës, ajo kërkoi të hedhet në votim për largimin ose jo të këtyre pikave të rendit të ditës.

Me vota unanime, pika e 7 e rendit të ditës u largua nga rendi i ditës (Raporti i menaxhimit të performancës dhe grantit të bazuar në performancë për vitin 2021).

Me 7 vota “për”, 17 vota “kundër” nuk u largua pika e 5 nga rendi i ditës.

Në fund të debatit jashtë rendit të ditës dhe për rendin e ditës, kuvendi pas votimit me 28 vota “për” 1 votë “kundër” dhe 1 votë “abstenim” aprovoi këtë:

R E N D I T E

1. Shqyrtimi dhe aprovimi i procesverbalit nga mbledhja e rregullt e Kuvendit të Komunës së Vushtrrisë, mbajtur më datë 29 shtator 2022;
2. Shqyrtimi i Raportit nëntëmujor mbi të hyrat dhe shpenzimet buxhetore;
3. Shqyrtimi i Informatës për përfundimin e vitit shkollor 2021/2022 dhe përgatitjet për fillimin e vitit shkollor 2022/2023;
4. Shqyrtimi i Informatës nëntëmujore lidhur me zhvillimin dhe realizimin e aktiviteteve kulturore, rinore dhe sportive duke përfshirë teatrin, bibliotekën dhe muzeun;
5. Shqyrtimi i Informatës lidhur me punën e Këshillit Komunal për Siguri në Bashkësi për gjashtëmujorin e parë të vitit 2022;
6. Shqyrtimi i Propozim – vendimit për formim të komisionit vlerësues për dhënien në shfrytëzim afatshkurtër të pronës së paluajtshme të komunës;
7. Shqyrtimi i Propozim – vendimit për lirim nga taksa komunale për projektet investive të KEDS-it gjatë vitit 2022;
8. Shqyrtimi i Propozim – vendimit për caktimin e lokacionit për ndërtimin e lapidarit në fshatin Pasomë;
9. Shqyrtimi i Propozim – vendimit për formimin e komisionit për shqyrtimin e ankesave lidhur me procesin e zgjedhjes së këshillave lokale.
10. Shqyrtimi i Propozim – vendimit për formimin e komisionit për hartimin e Rregullores për komitetet dhe komisionet e kuvendit;
11. Të ndryshme.

1. Shqyrtimi dhe aprovimi i procesverbalit nga mbledhja e rregullt e Kuvendit të Komunës së Vushtrrisë, mbajtur më datë 29 shtator 2022

Ilmi Azemi, anëtar i kuvendit - lidhur me procesverbalin tha se një diskutim i tij nuk është përfshirë, kërkoi që diskutimi i tij të përfshihet në procesverbal.

Sylejman Mehulli, anëtar i kuvendit - kërkoi që të plotësohet dhe korrigjohet tabela e planifikimit buxhetor, me emër të disa projekteve rr. „Ramadan Imeri” që gjendet në fshatin Liqej dhe jo në fshatin Akrashticë rr. „Jahir Bajrami”.

Kuvendi me 28 vota “për” miratoi procesverbalin nga mbledhja e kaluar e kuvendit i datës 29 shtator 2022.

2. Shqyrtimi i Raportit nëntëmujor mbi të hyrat dhe shpenzimet buxhetore

Sylejman Mehulli, anëtar i kuvendit - shprehu shqetësimin për vijën buxhetore tek investimet kapitale duke shtuar se vetëm 14% e gjithë buxhetit është shfrytëzuar dhe pjesa tjetër do të shkojë suficit. Shprehur më konkretisht kjo i bie se nga 5, 960.547 € të planifikuara për investime kapitale për vitin 2022 vetëm 831,372.073 € janë shpenzuar apo realizuar. Pjesa tjetër e totalit të buxhetit

për investime kapitale që gjendet në procedurat administrative të prokurimit rrezikon të shkojë në suficit dhe kjo është e tmerrshme dhe e bie komunën para një dështimi totale si asnjëherë më parë, sidomos në kushtet e një krize aq të madhe ekonomike. Ai përmendi se në Institutin GAP janë emrat e komunave që kanë realizuar buxhetin 19%, kurse ne si komunë edhe pas nëntë muajve akoma e kemi 14%, dhe çka do të ndodh në muajt në vazhdim, ku do të mbetet fati i 5 milionë eurove. Në rrethana të tilla më e pakta që është dashur të ndodhë do të duhej të kishte dorëheqje të përgjegjësve, apo shkarkim të ndonjë zyrtari në mungesë të performancës. Në fund kërkoi nga ekzekutivi që të jenë me vigjilentë në shpenzimin e buxhetit, sepse nuk ka komunë në Kosovë me buxhet kaq të vogël të realizuar.

Leonora Gërguri, anëtare e kuvendit – tha se tek shpenzimet e udhëtimeve zyrtare, kur bëjmë një krahasim me vitin e kaluar del se 15000 euro janë më shumë këtë vit, andaj pyeti kryetarin se çfarë benefite ka komuna nga këto udhëtime, si dhe kërkoi raport për këto shpenzime. Njëherazi tha se edhe shpenzimet e karburanteve janë rritur dhe diferenca del për 17000 euro, pavarësisht se çmimet e karburanteve janë ngritur, por siç e dimë kryetari banon në qytet dhe nuk ka aq shpenzime të mëdha karburantesh, por mos vallë këto shpenzime janë si rezultat se shumë anëtarë të qeverisë komunale po i marrin veturat zyrtare në shtëpi, kur dihet se ligji e precizon se vetëm kryetari mund të ketë veturën 24 h në shërbim. Tek kodi 13620 furnizim me ushqim dhe pije figuron shuma prej 83000 euro, ndërsa vitin e kaluar 12000, prandaj kërkoi të dijë se për çfarë shpenzime bëhet fjalë, kurse te kodi pasues për shërbime mjekësore janë 41000 euro më pak se vitin e kaluar, kështu po dëmtohen qytetarët pasi që edhe gjërat elementare po mungojnë në QMF-të, mos vallë po favorizohen institucionet private.

Ilmi Azemi, anëtar i kuvendit - duke ju referuar parafolëses për shfrytëzimin e veturave nga ana e qeverisë komunale tha se përveç kryetarit nuk e di që dikush tjetër e shfrytëzon veturën 24h, nuk di që dikush nga qeveria komunale e ka këtë beneficion duke shtuar që kishe qenë mirë që edhe drejtorëve t'ju mundësohet një benfit i tillë për kryerjen e detyrave nga drejtoritë. Mandej duke ju referuar parafolësit Sylejman Meholli, tha jemi në dijeni se nuk jemi mirë me buxhet, por faji bie mbi të gjithë neve pa dallim, sepse vitin e kaluar për inate politike nuk është votuar buxheti. Kurse sa i përket performancës së dobët të realizimit të buxhetit, tha se buxheti është aprovuar me vonesë dhe dihet mirë se 5 komuna kanë mbetur në mëshirën e qeverisë duke përfshirë edhe komunën tonë, e cila nuk ka treguar nivelin e menduar. Pastaj tha se qeveria qendrore është e interesuar në bllokimin e proceseve, jo për të ndihmuar në zhvillimin e komunave. Mandej tha se mandatin e kaluar ka pasur pagesa të faturave pa u përfunduar punët në projekte të ndryshme, kjo me qëllim të ngritjes së realizimit të buxhetit, por në këtë rast ftoj qeverinë aktuale që mos të veprojë asisoj sepse bënë shkelje ligjore. Në fund ceku se komuna, gjegjësisht Drejtoria e Prokurimit është në vllugun e aktiviteteve për ta rritur nivelin e realizimit të buxhetit në investime kapitale, por megjithëkëtë është dëshpërues fakti se Qeveria e Kosovës nuk ka treguar gatishmëri për t'i ndihmuar komunat, por më tepër ka pasur qasje bllokuese.

Sylejman Meholli, anëtar i kuvendit - tha se i gjithë faji nuk është vetëm tek miratimi i buxhetit, faji është edhe tek mënyra e realizimit. Ai në rastin konkret ceku blerjen e një rëntgeni stomatologjik, ku siç tha kërkesa është bërë në muajin maj sepse ende nuk është iniciuar nga prokurimi dhe ende jemi pa atë rëntgen. Në fund ai i kërkoi qeverisë komunale që mos ta humb këtë grant qeveritar pasi që me patjetër i duhet qytetit të Vushtrrisë.

Faton Hyseni, anëtar i kuvendit - duke ju referuar parafolësit Sylejman Melohllit, tha se të gjithë asamblastët e dinë sa i përket buxhetit se si ka rrjedhur dhe i dimë arsyet. Mehollit, i uroi të gjitha të mirat për këto vërejtje, kurse theksoi që duhet të nisemi nga parimi duke u nisur nga vetja së pari, sepse me ardhjen e kësaj qeverie është dëmtuar afro 45 euro parafolësi. Bashkëshortja e tij znj. Qëndresa Imeri punon në shkollën SH.M.U - 1, e cila siç theksoi ai ka qenë në listën e pagave në shkollën e mesme profesionale, dhe dallimi mes shkollës së mesme të ulët dhe shkollës së mesme të lartë është 45 euro, në këtë rrjedhë nëse e kalkulojmë këtë të hyrë për një vit del se familja Mehollit e ka dëmtuar buxhetin e komunës për rreth 450 €, ndërsa për dy vite afër 1000 €. Lidhur me këtë parashitje pyetje për parafolësin Mehollit, si është e mundur në të njëjtën kohë të punoni në dy vende, në të njëjtin orar, në institutin për Covid në Mitrovicë dhe në shkollën private "Viciana". Me këtë pyeti se a është shkelje e ligjit në të njëjtin orar t'i shfrytëzoni dy vende pune.

Sylejman Mehollit, anëtar i kuvendit - duke ju referuar parafolësit, vlerësoi se të dilet në foltoren e kuvendit kur diskutohet për realizime buxhetore dhe të flitet për pagat e individëve me emër, kjo fletë shumë për kualitetin e asamblastëve, kur ende nuk është kuptuar përmbledhja e shpenzimeve buxhetore të komunës. Tutje ai ju drejtua drejtoreshës së arsimit se i është përmendur bashkëshortja shumëherë në lidhje me vendin e punës, kurse shtoi se çdo dispozitë ligjore e keni në kompetencë ta zbatoni karshi ligjit. Ai nuk përzihet në çështjen e bashkëshortes së saj sepse ajo është e pavarur, ai nuk merret me pazare sikurse dikush që bënë pazare me anëtarë të familjes. Mandej tha se nuk bënë pazare për asgjë sikurse të tjerët dhe se nuk lëshohet në debate të tilla, pasi është kulturë profesionale për çka diskutoj. Ai theksoi se ligji e mundëson punën primare dhe sekondare dhe mund t'ua sjellë nenet përkatëse. Shkollat profesionale të mjekësisë duhet të kenë mjekë, sepse nxënësit nuk mund të mësojnë lëndë të mjekësisë pa mjekë, dhe asnjë mjek nuk e lë punën e mjekut për punën në arsim.

Faton Hyseni, anëtar i kuvendit – theksoi se nuk e ka cekur shkollën private "Viciana", në të njëjtën kohë nuk mund të punohet në dy shkolla. Ligji të jep të drejtën të punosh në honorar me 1/3. Ai theksoi se gjatë mandatit parafolësi ka punësuar bashkëshorten, ka marrë serën, ndërsa për tri vite sa ka qenë në mandat, ka shfrytëzuar buxhetin e shtetit në mënyrë jo të ligjshme dhe jo të hijshme dhe pyeti z.Mehollin se po ta kishin më gjatë pushtetin çfarë?

Sylejman Mehollit, anëtar i kuvendit - tha këto janë disa tendenca të ulëta që e kanë celulën nga fshati prej nga vini, por janë të dobëta dhe shtoi se raporton çdo vit në Agjencinë Kundër Korrupsionit dhe për çdo angazhim ka mbulesën ligjore dhe i paguan tatim shtetit.

Andan Lahu, anëtar i kuvendit – tha se sa u përket diskutimeve të dy parafolësve për gjuhë joparlamentare, kërkoi nga kryesuesja e kuvendit që si gardiane për mbarëvajtjen e mbledhjes së kuvendit të zbatojë Rregulloren e punës të kuvendit. Më tej u shpreh për raportin buxhetor dhe ju referuara parafolësit nga radhët e PDK-së, aq bukur dhe aq me emocion diskutoi krejt ndryshe nga qëndrimet e PDK-së para një viti. Kur dëgjohen qëndrimet e PDK-së para një viti lidhur me buxhetin dhe raportet buxhetore janë sikur nata me ditë me atë çka dëgjuam sot nga parafolësi Azemi. Buxheti vitin e kaluar nuk është votuar për arsye puro politike. Buxheti i kësaj qeverie në fillim të vitit është 90% i ngjashëm me buxhetin e vitit të kaluar. LDK ka votuar në mënyrë unanime buxhetin dhe nuk i gëzohet mosrealizimit të buxhetit dhe dështimit të komunës, pavarësisht se kush udhëheq.

Shpëtim Zhegrova, nënkryetar i komunës - theksoi që sa i përket votimit të buxhetit PDK ka bërë gabim që nuk ka votuar buxhetin vitin e kaluar. Anëtarët e kuvendit kanë dhënë propozime

për buxhetin edhe gjatë qeverisjes së LDK-së. Për realizimin e buxhetit tek investimet kapitale as anëtarët e qeverisë nuk janë të kënaqur me realizimin e buxhetit, duke shtuar se ka qenë i vështirë realizimi i buxhetit për shkak se shumë kompani janë në gjendje të rëndë, kurse sa i përket investimeve kapitale në nivel vendi është në të njëjtin nivel pothuajse në të gjitha komunat. Tek realizimi i buxhetit në komunën tonë, mund të jetë 54% në përgjithësi, mirëpo tek investimet kapitale ka ngecje në shumicën e komunave sikurse në komunën tonë. Ka pasur ndërprerje të kontratave për shkak të ngritjes së çmimeve dhe në këtë rast komuna nuk ka dashur të dëmtohen kompanitë dhe kontratat janë ndërprerë në mënyrë të dyanshme. Alokimi i mjeteve ka filluar në muajin maj dhe secila procedurë e prokurimit merr kohë dy muaj. Për realizimin e buxhetit sa i përket investimeve kapitale tha se do të jetë më mirë se vitin e kaluar, kurse për shpenzimet e derivateve tha se nafta është 70 deri në 80 centë me shtrenjtë sesa vitin e kaluar. Kështu që përveç kryetarit të komunës askush nuk e përdor veturën zyrtare 24 h. Asnjë nga drejtorët nuk e përdor veturën 24 h. Sa i përket shpenzimeve për zyrtarët është me rëndësi të punohet dhe është shumë me rëndësi që korrupsioni është ndërprerë në komunën tonë.

Bekim Zabërgja, anëtar i kuvendit - tha, sa i përket mosaprovimit të buxhetit ka qenë gabim pa marr parasysh arsyeve të subjekteve politike. Këtë vit buxheti është votuar në mënyrë unanime për shkak se qeverisja komunale ka përfshirë të gjitha projektet pa dallime partiake, për interesin e përgjithshëm qytetar. Ndërsa për moszbatim të buxhetit theksoi se nuk është e vetmja që buxheti është votuar vonë, por arsyeja kryesore është mosfunksionimi i organit shqyrtues të prokurimit në nivel qendror për 1 vit e një muaj, një ditë është shumë mosfunksionimi i këtij organi. Andaj bëri thirrje për Drejtorinë e Prokurimit që të angazhohet maksimalisht në mënyrë që mjetet mos të kthehen suficit.

Adnan Lahu, anëtar i kuvendit – tha se LDK nuk ka pasur asnjë marrëveshje, por e ka votuar buxhetin për qytetarët e jo për qeverinë (pushtetin). Andaj vërtetohet që 11 kërkesat për projekte të LDK-së për buxhetin nuk janë marrë parasysh.

Albanez Tahiraj, drejtor i prokurimit – tha se sa i përket rëntgenit të dhëmbëve nuk është e vërtetë që nuk është iniciuar procedura e prokurimit. Pritet të shpallet fituesi dhe nënshkrimi i kontratës.

Edona Gashi, anëtare e kuvendit - tha se në raportin e nëntëmujorit ka hasur e një sërë parregullsish ndaj shpresoi që janë gabime teknike. Më tutje shtoi se tek tabela shpenzimet, mallrat dhe subvencionet mungon tabela e subvencioneve, ndërsa tek tabela e kategorive ekonomike figuron shuma 585,717.67 euro, kurse për subvencione kërkoi të bashkëngjitet. Tek tabela e investimeve kapitale që është e detajuar për secilën drejtori, mungojnë projektet e planifikuara dhe të realizuara të Drejtorisë për Planifikim Urban dhe Mjedis dhe disa nga projektet e Drejtorisë së Shëndetësisë. Tek tabela që është përmbledhja e shpenzimeve sipas burimit të financimit tha se nuk pajtohet me komentin që është dhënë sipas saj, përveç që është jo mirë i kuptueshëm ka mundësi të jetë nga viti i kaluar dhe del se 259.000 euro janë realizuar me tepër se që janë planifikuar, ndërsa del se janë realizuar 11000 euro më pak se vitin e kaluar.

Sylejman Mehulli, anëtar i kuvendit - theksoi se lidhur me çështjen e rëntgenit të dhëmbit ndihet i gëzuar që Drejtorja e Prokurimit është në fazën finale.

Nasuf Aliu, anëtar i kuvendit – tha se në tabelën e parë vërehet se nuk ka pëlqime sanitare për këtë vit, ndërsa shtoi se tek planifikimi buxhetor, tek gjërat e inspektimeve këtë vit janë planifikuar 750 euro, ndërsa vitin e kaluar kanë qenë 8000 euro të realizuara. Më tutje tha se është një

planifikim jo i mirë i buxhetit në mënyrë që të dalë realizimi më i madh. Shprehu shqetësim për realizimin e buxhetit në tri drejtoritë: pylltari 13%, planifikim urban 18%, kulturë rini dhe sport 34%. Më tutje theksoi se ka shifra dalluese në raport me vitin e kaluar tek shpenzimet mallrat dhe subvencionet, furnizimi me pije, dreka jozyrtare 83242 euro, kur i shtohen edhe 23000 euro dreka zyrtare, del afro 106.000 euro. Kërkoj sqarim në lidhje me këto shpenzime.

Bujar Pllana drejtor i Drejtorisë së Inspektimeve - informoi anëtarët e kuvendit se nga shtatori i vitit 2021 inspektorët për pëlqime sanitare kanë kaluar në Agjencionin e Ushqimit dhe Veterinës dhe më nuk janë në kuadër të komunës pëlqimet sanitare. Tutje shtoi se kjo është arsyeja që nuk janë planifikuar në buxhet pëlqimet sanitare.

Isuf Jashari drejtor i financave – dha sqarime lidhur me të hyrat dhe shpenzimet për raportin nëntëmujor. Tutje tha se gjendja e realizimit të buxhetit është shqetësuese, por kjo gjendje do të ndryshojë për të mirë.

Nasuf Aliu, anëtar i kuvendit - pyeti, pse janë gjithë këto shpenzime për pije dhe dreka zyrtare, si dhe përmendi një projekt në Drejtorinë e Bujqësisë që ka të bëjë me serrën, pyeti se çfarë ngritje e serrës mund të bëhet me 2 euro.

Remzi Ahmeti, drejtor për gjeodezi dhe kadastër - duke ju referuar pyetjes së Nasuf Aliut, tha se vitin e kaluar ishte kohë pandemie dhe nuk ishin në funksion çerdhet, kurse tani në këto shpenzime hyjnë edhe ushqimi i çerdheve.

Agim Bregaj, anëtar i kuvendit - tha, se arsyeja kryesore për mosrealizim të buxhetit është ndërrimi i shpeshtë i drejtorëve, kurse e kritikoi kryetarin për prurjet e reja si staf mbështetës në komunë.

Në fund të debatit lidhur me këtë pikë të rendit të ditës kuvendi pas votimit: me 12 vota “për”, 15 vota “kundër” dhe 2 abstenime nuk e aprovoi raportin nëntëmujor për të hyrat dhe shpenzimet.

3. Shqyrtimi i Informatës për përfundimin e vitit shkollor 2021/2022 dhe përgatitjet për fillimin e vitit shkollor 2022/2023

Ilmi Azemi, anëtar i kuvendit - i rekomandoi DA-së, gjegjësisht kryetarin të komunës që të rishikojë mundësinë që shkollat të pajisen me aparatet fotokopjues. Më tej propozoi që mësimitdhënësve ‘tu paguhet kujdestaria e klasës dhe kujdestaria e ditës, pastaj të bëhet ndërrimi i tabelave të zeza shënuese aty ku janë të dëmtuara. Të fillohet me trajnimin e stafit arsimor për të filluar me furnizim me tabela digjitale. Të shikohet mundësia që nxënësit të furnizohen me kiflet prej nivelit parafillor deri në klasën e nëntë. Pastaj propozoi që mësimitdhënësit të paguhen për orët shtesë që mbajnë jashtë kontratës që kanë dhe të rishikohet se në cilat lëndë ka mbi normë. Mandej propozoi që mësimitdhënësit të pajisen me uniforma ashtu që uniformat t’i sigurojë komuna përmes procedurave të tenderimit, shkollat të pajisen me laboratorë dhe kabinete, të krijohen kushte të konkretizimit, të rishikohet mundësia e ndërtimit të fushave sportive për ato shkolla që posedojnë. Drejtorisë e Arsimit të ofron kushte të punës duke ju ofruar në dispozicion së paku dy automjete në shërbim të zyrtarëve. Të bëhet rrënim i shkollave të vjetra ose të ndërmerren masa për renovimin e tyre aty ku ekziston mundësia.

Ymer Haradinaj, anëtar i kuvendit - tha se nga informatat që i ka marrë nga stafi manaxhues në Sh.M.P. “Bahri Haxha” në listat e pagave për muajin shtator ekzistojnë tre mësimdhënës në listë e që nuk punojnë në shkollën profesionale “Bahri Haxha”. Fjala është për Astrit Jasharin, Qëndresa Imerin dhe Zylfije Ymeri-Krasniqi, këta mësimdhënës kanë mbetur në listë nga qeverisja e kaluar që e kishte kritikuar për mospunë, kështu që kërkoi që këta mësimdhënës që kanë marrë më tepër mjete financiare të zbatohet ligji që t’i kthejnë ato mjete. Për më keq është një mësimdhënës që punon në shkollën profesionale “Bahri Haxha”, ndërsa pagën e merr në listën e shkollës së mesme të ulët në fshatin Pasomë, fjala është për Avdush Zymberin. Nga takimet që ka pasur në terren, ka marrë informacione se në disa shkolla ka mungesë të letrës siç është rasti në shkollën në fshatin Samadrexhë. Më tej pyeti se sa është numri i shkollave që kanë mungesë të gjeneratorëve dhe me lëndë djegëse, sepse viteve të kaluara kemi pasur shumë probleme me furnizim me lëndë djegëse dhe me ngrohje në objektet shkollore. Më tej kërkoi që të bëhet pagesa për mësimdhënësit që mbajnë orë jashtë normës së paraparë të tyre. Të organizohen më tepër trajnime për stafin arsimor, si dhe bëhen përpjekje për mbulimin e shpenzimeve për nxënësit e shkollave të mesme. Pastaj tek faqja 7 e kësaj informate thuhet se nga shtatori i vitit 2021 e deri në muajin gusht 2022 janë pranuar gjithsej 46 punëtorë dhe janë larguar 41 punëtorë. Këtu sigurisht ka ndonjë gabim teknik, por nëse kjo është e vërtetë, atëherë duhet të jepen sqarime. Tek testi i arritshmërisë në vitin 2022 krahasuar me vitin 2021 kemi rënie nga 49.78% në 44.59 % dhe kjo është shumë shqetësuese. Sa i përket suksesit të shkëlqyeshëm të klasave 1-5 po ashtu kemi rënie për 2.7%, tek klasat 6-9 sukcesi i shkëlqyeshëm po ashtu ka rënie për 0.73% dhe tek shkollat e mesme po ashtu kemi rënie të suksesit të shkëlqyeshëm për 3.1 %. Gjithashtu tha se duhet të kemi investime më të mëdha në rregullimin e oborreve të shkollave. Në fund pyeti se kush është staf në DA dhe cila është përgatitja e tyre profesionale.

Faton Hyseni, anëtar i kuvendit – tha se e ka lexuar në tërësi këtë informatë dhe vlerësoi se e përgëzon drejtoreshën e arsimit dhe stafin e saj për punën e mirë që janë duke bërë. Tutje shtoi se është evident fakti se ka të arritura në lëmin e arsimit në Vushtrri, duke filluar nga organizimi i garave, që asnjëherë më parë nuk ka pasur kaq shumë organizime në këtë drejtim. Pastaj ka të arritura të konsiderueshme në përmirësimin e infrastrukturës shkollore, në renovimin e objekteve, ndërtimin e shkollave të reja, fushave sportive, rrethojave të shkollave dhe laboratorëve. Në vazhdim ai duke ju referuar statistikave në informatë, ceku se kemi të arritura edhe për sa i përket suksesit të nxënësve si në shkollat e mesme të ulëta e po ashtu edhe në shkollat e mesme të larta dhe këtyre sukseseve duhet t’ju gëzohemi të gjithë. Ai kërkoi nga komuna që shkolla fillore “Nazmi Zhegrova” në Stanoc të Poshtëm të ketë kycje në shërbimet e internetit në operatorin ipko sepse nga muaji mars kjo shkollë nuk ka qasje në rrjetin e internetit. Mandej kërkesa tjetër është që bëhet një aneks i objektit në shkollën “Nazmi Zhegrova” pasi që në fshatin Stanoc i Poshtëm është duke u rrit numri i banorëve dhe rrjedhimisht po rritet edhe numri i nxënësve. Në fund potencoi se kolektivi i shkollës fillore “Nazmi Zhegrova” në Stanoc të Poshtëm ka vërejtje të theksuara për sa i përket Draft-ligjit për pagat në koeficientët e mësimdhënësve për shkollat e mesme të ulëta në krahasim me shkollat e mesme të larta ku kërkoi që të kemi njëjtësim të këtyre koeficientëve dhe po ashtu kërkoi nga anëtarët e LVV-së në Vushtrri që këtë kërkesë ta adresojnë në Ministrinë e Arsimit, pasi kjo ministri udhëhiqet nga ana kësaj partie politike.

Ymer Haradinaj, anëtar i kuvendit - tha se kemi ngritje të rezultatit në testin e maturës të nxënësve të Shkollës së mesme profesionale “Bahri Haxha” ngritja është kualitative në rezultate

nga viti 2022 ku kemi pas 39.53 % të kalueshmërisë, në vitin 2021 kemi 48.38 %, ndërsa në vitin 2022 72.87 %, në këtë rast falënderoi të gjithë nxënësit, prindërit, mësime dhe stafin udhëheqës të shkollës për një punë të përbashkët ekipore e cila ka sjellë këtë rezultat mjaft të favorshëm. Në fund ngriti një çështje të një shkolle në hyrjen e të cilës është vendosur një njoftim ku thuhet se <iu ndalohe prindërve hyrja në oborrin e shkollës dhe ndërtesën e shkollës>. Andaj rastet e tilla nuk i kontribuojnë bashkëpunimit në mes shkollë-nxënës dhe prindër, në këtë rast kërkoi nga DA që ta urdhërojë drejtorin e asaj shkolle që ta heqë atë njoftim nga shkolla.

Sylejman Mehulli, anëtar i kuvendit - duke ju referuar faqes 22 të informatës tek tabela krahasimore ku ceket se kemi rënie të suksesit shkëlqyeshëm në 2.7 %, ndërsa thuhet se në vitin 2021 shkëlqyeshëm kanë kaluar 958 nxënës për klasat nga 1-5, në vitin 2022 1057 nxënës, pra është rritur numri i nxënësve me sukses të shkëlqyeshëm nga 18 deri 22 %, kurse në përshkrim thuhet se kemi rënie në sukses, kjo sigurisht duhet të jetë ndonjë gabim. Mandej në faqen 25 kemi një lëshim që në titullin e tabelës për klasat e VI dhe IX sukse i fundvitit shkollor 2021 krahasuar me periudhën e njëjtë të vitit 2020 për klasat VI dhe IX, pastaj në tabelë krahasimi nuk bëhet me vitin 2020, por për vitet 2021 dhe 2022, pra edhe në këtë rast kemi të bëjmë me ndonjë lëshim teknik. Në faqe 28 sukse i shkollor i fundvitit 2021 krahasuar me periudhën e vitit 2020 i klasave të X dhe XII thuhet se tek sukse i shkëlqyeshëm kemi rënie të suksesit për 31 %, kurse krahasimi i vitit 2022 me vitin 2021 del që është rritur numri i nxënësve të shkëlqyeshëm nga 314 në vitin 2021 në 341 në vitin 2022. Situata e njëjtë është edhe tek sukse i nxënësve me sukses shumë mirë që në vitin 2021 kemi 479 nxënës me sukses shumë mirë, ndërsa në vitin 2022 kemi 500 nxënës që i bie se kemi ngritje të këtij suksesit, por që në përshkrim tekstual në informatë thuhet diçka tjetër. Përgjithësisht me përjashtim të këtyre gabimeve teknike është prezantuar një informatë e mirë, dhe i përgëzon të gjithë mësime dhe DA-në dhe nxënësit për suksesin e arritur në vitin shkollor. Në fund kërkoi nga të gjithë që të kemi një debat substancial dhe analitik sa i përket arsimit dhe cilësisë së tij në komunën tonë, duke lënë anash obstrukcionet politike.

Miradije Maloku, drejtoreshë e DKA-së - paraqiti sqarime të përgjithshme lidhur me informatën për përfundimin e vitit shkollor 2021/2022 dhe përgatitjet për fillimin e vitit shkollor 2022/2023, duke u përgjigjur në temat e ngritura nga anëtarët e kuvendit. Duke ju referuar diskutimit të anëtarit të kuvendit z. Ymer Hardinaj për disa punëtorë të arsimit që kanë marrë pagë më tepër sesa ju ka takuar, ceku se numri i këtyre punëtorëve është 15 e jo 3 siç u prezantua. Ajo sqaroi se këtë gjendje e ka trashëguar dhe është në përpjekje për ta rregulluar, por kjo çështje ka të bëjë me ndryshime në sistem. Më tej ajo paraqiti statistika dhe të dhëna tjera të vlefshme lidhur me numrin e nxënësve dhe për klasat e kombinuara ku u zotua se do të bëjë përpjekje për zgjidhjen e problemeve sa i përket mësimi të kombinuar.

Adnan Lahu, anëtar i kuvendit - falënderoi drejtoreshën për informatën korrekte që e ka prezantuar para kuvendit, duke ditur se udhëheqë njërin ndër dikasteret më të vështirë për t'u menaxhuar, i dëshiroi punë të mbarë dhe sukse.

4. Shqyrtimi i Informatës nëntëmujore lidhur me zhvillimin dhe realizimin e aktiviteteve kulturore, rinore dhe sportive duke përfshirë teatrin, bibliotekën dhe muzeun

Leonora Gërguri, anëtare e kuvendit - parashtrio pyetje për drejtoreshën e Drejtorisë së Kulturës, përse nuk e keni paguar shpërbimin e klubit të Hendbollit "Vushtrria F" që janë bërë

kampion i Kosovës vitin e kaluar ashtu siç parashihet me Rregulloren për dhënien e dekoratave, ku parashihet se këtij klubi i takojnë rreth 5000 €.

Medina Bunjaku, drejtoreshë e DKRS-ës - tha se kjo ngjarje ka ndodhur në mandatin e kaluar dhe kjo qeveri nuk ka obligim t'i përmbush kërkesat nga mandati i kaluar.

Shpëtim Zhegrova, nënkryetar i komunës - tha se konform rregullores komunale, komuna ka obligim t'i përmbush obligimet nga e kaluara dhe konform buxhetit që kemi do ta përmbushim atë obligim.

5. Shqyrtimi i Informatës lidhur me punën e Këshillit Komunal për Siguri në Bashkësi për gjashtëmujorin e parë të vitit 2022

Nasuf Aliu, anëtar i kuvendit - tha se nuk ka informacione se kjo informatë a është hartuar në formë shabllon pasi që në këtë dokument përmendet emri i ish-kryetarit të komunës Xhafer Tahiri, kërkoi që kjo të korrigjohet pasi që është joserioze të dilet në publik një dokument me kësi lloj gabimesh.

Shpëtim Zhegrova, nënkryetar i komunës - tha se një gabim i tillë është trashëguar nga e kaluara dhe është përsëritur nga zyra e kryetarit të komunës, i njëjti do të përmirësohet.

Adnan Lahu, anëtar i kuvendit - njoftoi se në fillim të mbledhjes u kërkua që kjo pikë të mos futet në rend të ditës, pasi që e njëjta duhet korrigjuar dhe më tej të procedohet.

Ilmi Azemi, anëtar i kuvendit - sqaroi se kjo pikë e rendit të ditës është e paraparë me Planin e punës të kuvendit dhe e njëjta duhet të korrigjohet dhe ashtu të procedohet.

6. Shqyrtimi i Propozim – vendimit për formim të komisionit vlerësues për dhënien në shfrytëzim afatshkurtër të pronës së paluajtshme të komunës

Mentor Hasani, anëtar i kuvendit - propozoi Arlind Gogollin për anëtar të komisionit vlerësues për dhënien në shfrytëzim afatshkurtër të pronës së paluajtshme të komunës, nga radhët e PDK-së.

Adnan Lahu, anëtar i kuvendit - deklaroi se grupi kuvendar i LDK-së nuk ka propozim për këtë komision.

Sylejman Mehulli, anëtar i kuvendit - tha se duhet pasur për bazë ligjshmërinë e këtij vendimi, sepse në radhën e propozimeve për këtë komision kemi shërbyes civilë që nuk dihet a është në rregull që ata të jenë pjesë e këtij komisioni. Për këtë komision nga radhët e LVV-së propozoi z.Refik Malokun.

Shpëtim Zhegrova, nënkryetar i komunës - propozoi për anëtar të komisionit vlerësues për dhënien në shfrytëzim afatshkurtër të pronës së paluajtshme të komunës z.Isak Hyenin nga radhët e shoqërisë civile.

Agron Përçuku, anëtar i kuvendit - tha se është shqetësues fakti se shefi i grupit kuvendar të LDK-së z.Adnan Lahu heq dorë nga propozimet për komisione komunale e që janë obligime ligjore, sepse anëtari i LDK-së z. Shkelzen Xhaferi në cilësinë e anëtarit të komisioneve të ndryshme nuk i ka kryer si duhet detyrat e tij.

Në fund të debatit lidhur me këtë pike të rendit të ditës Kuvendi pas votimit me 27 vota “për” 1 votë “kundër” vendosi me sa vijon:

1. Me këtë vendim formohet Komisioni vlerësues për zbatim të procedurave të dhënies në shfrytëzim afatshkurtër të pronës së paluajtshme të komunës, për ofrim të shërbimeve të transportit të mjeteve motorike me automerimangë në territorin e komunës.

2. Në përbërje të komisionit vlerësues caktohen:

2.1.Arlind Gogolli, anëtar i kuvendit (PDK);

2.2.Refik Maloku, anëtar i kuvendit (LVV);

2.3.Benjamin Shala, ekzekutivi i komunës (DSHP);

2.4.Bajram Beqiri, ekzekutivi i komunës (përfaqësues nga DMSH);

2.5.Isak Hyseni, shoqëria civile në nivel komunal.

3. Anëtarët e komisionit vlerësues në takimin e parë, me shumicë votash, zgjedhin kryesuesin i cili e kryeson komisionin.

4. Komisioni vlerësues ka mandat për shqyrtim të ofertave për shërbimin e transportit me automerimangë, në pronën e përfshirë në vendimin paraparak të Kuvendit të komunës.

5. Detyrat dhe përgjegjësitë e komisionit:

5.1 Komisioni vlerësues zbaton procedurat e ankandit publik për shërbimet e transportit me automerimangë në pronën e paluajtshme të komunës, e cila është dhënë në shfrytëzim, që nënkupton:

5.2. Njoftimin publik i cili zgjat 15 ditë kalendarike nga dita e publikimit;

5.3. Njoftimi publik publikohet në faqen zyrtare të komunës, në tabelën e shpalljeve të komunës dhe së paku në njërën nga mediat e shkruara dhe elektronike;

5.4. Njoftimi duhet të përmbajë të dhënat kadastrale të pronës, lokacionin, përshkrimin e shërbimit me automerimangë, kohëzgjatjen e shfrytëzimit, formën e konkurrencës, arsyeshmërinë e interesit publik, çmimin fillestar, kërkesat për pjesëmarrje në konkurrim, kohën dhe vendin ku mbahet ankandi dhe hapja e ofertave;

5.5. Pas pranimit të ofertave, komisioni vlerësues bën vlerësimin e tyre në përputhje me kushtet e përcaktuara në njoftimin publik;

5.6. Komisioni vlerësues përzgjedh përfituesin brenda afatit prej 7 ditësh nga dita e mbylljes së njoftimit publik në rastet e vlerësimit të ofertave për dhënie në shfrytëzim afatshkurtër të shërbimeve të transportit me automerimangë;

5.7. Njoftimin për përzgjedhjen e ofertave, komisioni e publikon në faqen zyrtare të komunës, si dhe të njëjtin ju dërgon palëve të përfshira në proces;

5.8. Komisioni vlerësues pas përfundimit të afatit për shqyrtimin e ankesave për dhënie në shfrytëzim të shërbimeve të transportit me automerimangë, ofertën e përzgjedhur e procedon tek Kryetari i komunës për nënshkrim të kontratës me përfituesin;

5.9. Vendimet në komisionin vlerësues merren me shumicë të votave të anëtarëve të komisionit;

5.10. Komisioni, për punën e tij mban procesverbal të cilin e nënshkruan procesmbajtësi dhe kryesuesi i komisionit.

5. Për zbatimin e këtij vendimi obligohen anëtarët e komisionit vlerësues.

6. Ky vendim hyn në fuqi shtatë (7) ditë pas publikimit në faqen zyrtare të Komunës së Vushtrrisë.

7. Shqyrtimi i Propozim – vendimit për lirim nga taksa komunale për projektet investive të KEDS-it gjatë vitit 2022

Ilmi Azemi, anëtar i kuvendit - tha se kjo pikë e rendit të ditës është e elaboruar mirë e njëjta është konform rregullores dhe për të njëjtën kemi një interes si komunë për zhvillimin e infrastrukturës publike, andaj kërkoi që ky propozim-vendim të mbështetet nga të gjitha grupet kuvendare.

Sylejman Mehulli, anëtar i kuvendit - tha se për lirimin nga këto taksa komunale, nëse ekziston rregullorja komunale, atëherë ky propozim-vendim nuk është dashur të silltet fare në kuvend. Në të kundërtën nëse parashihet me rregullore, në emër të grupit të tij kërkoi që operatori ekonomik KEDS të mos lirohet, por që i njëjti t'i kryen obligimet financiare për prerje të asfaltit, pasi që kjo kompani është profitabile.

Shpëtim Zhegrova, nënkryetar i komunës - tha se sa i përket anës ligjore të kësaj pike të rendit të ditës, këtë mund ta vlerësojë zyra ligjore e komunës e cila është prezent në këtë mbledhje të kuvendit dhe njoftoi se në takimin që kanë pasur me zyrtarët e KEDS- janë dakorduar që për vitet e ardhshme projektet që i zhvillon komuna në infrastrukturë, atëherë KEDS-i t'i paraprijë me shtrimin e kabllave elektrike, andaj në këtë rrafsh kërkoi që kjo pikë të mbështetet pasi që është në interes të komunës të rritet bashkëpunimi me KEDS-in për investime të reja.

Ymer Haradinaj, anëtar i kuvendit - kërkoi që në propozim-vendim të bëhet korrigjimi i toponimeve, të bëhen sipas emërtimeve zyrtare. Për këtë vlerësoi se është mirë t'i dërgohet një shkresë zyrtare KEDS-it, që t'i kërkohet që të përmirësohen këto emërtime.

Adnan Lahu, anëtar i kuvendit - tha se nëse ka ndonjë marrëveshje mes komunës dhe KEDS-it atëherë është mirë që ajo t'i prezantohet kuvendit. Në këtë kontekst shtoi se nëse KEDS investon në kthimin e rrugëve në gjendje e mëparshme, ky propozim-vendim duhet të përkrahet në mënyrë unanime nga kuvendi.

Në fund të debatit lidhur me këtë pike të rendit të ditës Kuvendi pas votimit me 16 vota “për” 10 vota “kundër” vendosi me sa vijon:

1. Me këtë vendim lirohet nga taksa komunale për prerje të asfaltit dhe demolim të kubëzave Divizioni i Shpërndarjes KEDS, i cili është duke i implementuar projektet me plan investiv 2021 në Komunën e Vushtrrisë si në vijim:

1.1. Projekti “TS Idrizi” fshati Dobërllukë, ndërtimi i rrjetit TM10 (20) kv dhe TU0.4Kv;

1.2. Projekti Dobërllukë (Banjska), zgjerim dhe përforcim i rrjetit distributiv;

1.3. Projekti, Stanoci 1 “Prekazët”, fshati Stanoc i Poshtëm, Komuna e Vushtrrisë zgjerim dhe përforcim i rrjetit distributiv;

1.4. Projekti Bregaj - Stanoc, fshati Stanoc i Epërm, Komuna e Vushtrrisë, zgjerim dhe përforcim i rrjetit distributiv.

2. Këto projekte kanë për qëllim riparimin e rrjetit elektrik dhe përmirësimin e cilësisë së furnizimit me energji elektrike në komunën tonë.

3. Për zbatimin e këtij vendimi obligohen Drejtoria për Shërbime Publike dhe Drejtoria për Inspektime.

4. Ky vendim hyn në fuqi shtatë (7) ditë pas publikimit në faqen zyrtare të Komunës së Vushtrrisë.

8. Shqyrtimi i Propozim – vendimit për caktimin e lokacionit për ndërtimin e lapidarit në fshatin Pasomë

Melihate Basholli - Latifi, kryesuese e KK-së – para se ta hapë diskutimin për këtë pikë të rendit të ditës, ajo sqaroi se pikat që kanë ardhur para mbledhjes së KPF-së janë përgatitur sipas statutit të vjetër. Kështu që, ajo kërkoi nga sekretaria e kuvendit që vendimet të hartohen në harmoni me statutin e ri sepse tani statuti ka hy në fuqi. Prandaj, kjo pikë e rendit të ditës duhet të trajtohet sipas rregullave të statutit të ri, ku neni 17, paragrafi 11 parasheh që: “Vendimi për ngritjen e lapidarëve, shtatoreve, pllakave përkujtimore, merret me votat e 2/3 të anëtarëve të Kuvendit të komunës. Votimi në të gjitha rastet bëhet në mënyrë të fshehtë”.

Ali Januzi, anëtar i KK-së – tha se sot me kënaqësi diskuton për këtë pikë të rendit të ditës. Është një gëzim dhe sukses i madh që prej vitit 1945 deri më sot, pra pas 77 viteve po diskutojmë për një figurë të madhe. Pra, fjala është për komandantin Adem Voca, i cili veç ka hyrë në analet e historisë. Nuk mund të flas shumë për figurën e tij, pasi që nuk jam historian, por për të folur për të duhet një akademi e tërë të debatojë, të diskutojë dhe ta ngrit aty ku e ka vendin, Adem Voca. Historia nuk fillon me ne, ajo është e gjatë dhe gjeneratat para neve kanë dhënë kontribut të madh për lirinë e këtij vendi. Kemi marrë një iniciativë për ndërtimin e lapidarit për Adem Vocën, në vendin ku e ka pasur shtëpinë dhe kullën (ku kulla e tij në vitin 1945 është rrafshuar). Ai trull nuk ka kontest dhe ai vend ka një histori të gjatë. Ne lagjja “Dautaj”, e kemi blerë atë vend, kur kanë dalë ata prej aty, por ato dokumente sistemi jugosllav i ka djeg dhe shkatërruar. Lapidari duhet të vendoset aty ku është bërë rezistenca nga Adem Voca. Prandaj, po e lus kuvendin dhe komunën që sa më shpejtë të fillojë ndërtimin e këtij lapidari. Kam biseduar me kryetarin e komunës dhe i thashë se nëse bëhet një lapidar shkel e shko, më mirë ta lëmë krejt këtë punë. Në fund tha se ashtu

siç ka qenë figurë madhështore Adem Voca, kërkoj që me vota unanime kuvendi ta votojë këtë lapidar me qëllim që ta nderojë historinë dhe figurën e Adem Vocës.

Agron Përçuku, anëtar i KK-së – e përshëndesim këtë iniciativë nga propozuesi për caktimin e lokacionit për ndërtimin e lapidarit në fshatin Pasomë. Por, kemi kërkuar në KPF nga hartuesi i këtij propozimi që kur bëhet fjalë tek prona (ku në kadastër figuron tokë bujqësore), kemi kërkuar që të bëhet ndërrimi i destinimit nga tokë bujqësore në tokë ndërtimore. Pra, ta votojmë me komplet dokumentacionin ashtu siç duhet.

Remzi Ahmeti, drejtor i Drejtorisë për – tha se pa marrë vendim kuvendi për caktim të lokacionit nuk mund të bëjmë shndërrimin e tokës bujqësore në ndërtimore, sepse nuk e dimë se a kalon ajo. Ai tha se ne do ta bëjmë shndërrimin pas aprovimit nga kuvendi.

Shpëtim Zhegrova, Nënkryetar i komunës – tha se pas miratimit të vendimit nga kuvendi, pastaj shkon për vlerësim të ligjshmërisë në MAPL. Por, kjo tokë është e klasës së katër dhe drejtorja nuk mund drejtpërdrejt ta bëjë shndërrimin e tokës bujqësore në ndërtimore (por vetëm nga klasa e pestë e tutje). Por, pasi është çështja për lapidar, besoj që edhe ministria do të hasë në mirëkuptim dhe do ta kthejë të ligjshëm vendimin, në mënyrë që t'i vazhdojmë procedurat tjera.

Ali Januzi, anëtar i kuvendit - nuk i di kategoritë e tokave, por ajo mund të jetë e klasës së gjashtë apo shtatë, sepse gjendet në breg dhe është e klasës më të dobët. Më tej njoftoi se ai lapidar po ndërtohet në oborrin e tij ku e kishte bërë rezistencën kundër armikut. Prona më vonë është blerë nga lagjja “Dautaj” dhe ka mbet në shërbim të katundit. Në këtë kontekst kërkoj që të thjeshtëzohen procedurat dhe mos të shkaktohen probleme sepse bëhet fjalë për një figurë unike dhe madhështore që ka luftuar për lirinë e këtij vendi.

Melihate Basholli - Latifi, kryesuese e KK-së – lexoi edhe njëherë paragrafin 11 të nenit 17 të Statutit të komunës, i cili thotë: “Vendimi për ngritjen e lapidarëve, shtatoreve, pllakave përkujtimore, merret me votat e 2/3 të anëtarëve të Kuvendit të komunës. Votimi në të gjitha rastet bëhet në mënyrë të fshehtë”. Meqenëse e kemi votimin e fshehtë, ajo kërkoj themelimin e komisionit prej tre anëtarëve për mbarëvajtjen e procesit të votimit.

Ali Januzi, anëtar i kuvendit – tha se nuk i njoh këto procedura, por të gjithë lapidarët që janë bërë që nga paslufta nuk kanë shkuar në këtë formë.

Melihate Basholli - Latifi, kryesuese e KK-së – sqaroi se tashmë statuti i ri i komunës ka hyrë në fuqi dhe ligjërisht kjo është procedura e votimit që parashihet për votimin, për ndërtimin e lapidarëve.

Mentor Hasani, anëtar i kuvendit - propozoi znj. Nurie Halili nga radhët e PDK-së për anëtare të komisionit për mbarëvajtjen e procesit të votimit lidhur me aprovimin e Propozim-vendimit për caktimin e lokacionit për ndërtimin e lapidarit në fshatin Pasomë.

Alban Bajrmai, anëtar i kuvendit - në emër të grupit kuvendar të LDK-së propozoi z.Agron Perçukun për anëtar të komisionit për mbarëvajtjen e procesit të votimit lidhur me aprovimin e Propozim-vendimit për caktimin e lokacionit për ndërtimin e lapidarit në fshatin Pasomë.

Sylejman Mehulli, anëtar i kuvendit - në emër të grupit kuvendar të LVV-së propozoi z.Mek Selacin për anëtar të komisionit për mbarëvajtjen e procesit të votimit lidhur me aprovimin e Propozim-vendimit për caktimin e lokacionit për ndërtimin e lapidarit në fshatin Pasomë.

Kuvendi i komunës me shumicë votash themeloi komisionin për mbarëvajtjen e procesit të votimit, lidhur me aprovimin e Propozim-vendimit për caktimin e lokacionit për ndërtimin e lapidarit në fshatin Pasomë, në këtë përbërje:

*Nurie Halili, anëtare e kuvendit (PDK);
Agron Përçuku, anëtar i kuvendit- (LDK) dhe
Mek Selaci, anëtar i kuvendit- (LVV).*

Komisioni, për mbarëvajtjen e procesit të votimit, lidhur me aprovimin e Propozim-vendimit për caktimin e lokacionit për ndërtimin e lapidarit në fshatin Pasomë, pas numërimit të votave konstatoi se nga 27 fletëvotime, 24 vota janë “për” dhe 3 vota “kundër”, dhe kështu u aprovua propozim-vendimi në fjalë.

Melihate Basholli - Latifi, kryesuese e kuvendit - konstatoi se miratohet Propozim-vendimi për caktimin e lokacionit për ndërtimin e lapidarit në fshatin Pasomë.

Lidhur me këtë pikë të rendit të ditës kuvendit vendosi me sa vijon:

1. Me këtë vendim caktohet lokacioni për ndërtimin e lapidarit në fshatin Pasomë, pjesë nga parcela kadastrale P-70202050-01296-0 në sipërfaqe prej 613 m², nga sipërfaqja e përgjithshme prej 89886 m², me kulturë kullosë e kl.4 ZK - Pasomë, e cila evidentohet si pronë e Komunës së Vushtrrisë.

2. Me këtë vendim lejohet ndërrimi i destinimit të patundshmërisë të cekur në nenin 1 të këtij vendimi, kurse me hyrjen në fuqi të këtij vendimi, obligohet Drejtoria për Kadastër, Gjeodezi dhe Pronë që të bëjë ndërrimin e destinimit (kulturës) së kësaj parcele në elaboratin kadastral.

3. Për zbatimin e këtij vendimi obligohen: Drejtoria për Kulturë, Rini dhe Sport, Drejtoria për Kadastër, Gjeodezi dhe Pronë, si dhe Drejtoria për Urbanizëm dhe Mbrojtje të Ambientit.

4. Ky vendim hyn në fuqi shtatë (7) ditë pas publikimit në faqen zyrtare të Komunës së Vushtrrisë.

9. Shqyrtimi i Propozim – vendimit për formimin e komisionit të ankesave lidhur me procesin e zgjedhjes së këshillave lokale.

Ymer Haradinaj, anëtar i KK-së – tha se neni 10 i Rregullores për Organizimin, Funksionimin dhe Bashkëpunimin e Komunës me Fshatrat, Vendbanimet dhe Lagjet Urbane parasheh që: “Kuvendi i komunës themelon komisionin e ankesave, i cili i shqyrton ankesat lidhur me procesin e zgjedhjes së këshillave lokale; komisioni i ankesave do të ketë 3 anëtarë, të cilët zgjedhen nga radhët e anëtarëve të Kuvendit të komunës; përbërja e komisionit duhet të përfaqësojë përbërjen e subjekteve politike me numër më të madh të anëtarëve të përfaqësuar në Kuvendin e komunës; të gjithë pjesëmarrësit në takimin zgjedhor mund të paraqesin ankesat e tyre, nëse konstatojnë ndonjë parregullsi gjatë procesit zgjedhor; ankesat për parregullsi në procesin zgjedhor duhet të paraqiten tek komisioni për ankesa brenda 3 ditëve të punës; komisioni i ankesave është i obliguar që t’i shqyrtojë të gjitha ankesat dhe brenda afatit prej pesëmbëdhjetë (15) ditë pune, nga data e parashtrimit të ankesës t’ju kthejë përgjigje me shkrim atyre që kanë adresuar ankesën; vendimet

e komisionit të ankesave janë përfundimtare në procedurën administrative dhe të obligueshme për palët; komisioni i ankesave i raporton Kuvendit të komunës”. Në ditën kur është themeluar komisioni, na është dërguar vendimi për themelim, mirëpo vendimi është i mangët, për shkak se në vendim ka pasur kërkesë dhe është aprovuar nga Kuvendi i komunës që ky komision për punën e bërë do të kompensohet, kurse kur na është dërguar vendimi, nuk parashihet mënyra e kompensimit. Prandaj, ai kërkoi që të plotësohet ky vendim dhe të parashihet kompensimi i komisionit për zgjedhjen e këshillave lokale, sepse është një punë shumë voluminoze, e cila po na merr shumë kohë. Ai tha se si komision do ta sjellim në seancën e nëntorit raportin me shkrim, ku deri më tani i kemi zgjedhur 10 këshilla lokale, kurse në disa zona nuk ka pasur kuorum të mjaftueshëm, duke shtuar se nga dita e shtunë do të fillojë zgjedhja e këshillave në qytet dhe i ftoi qytetarët që të marrin pjesë sa më masivisht për zgjedhjen e këtyre këshillave, sepse janë shumë të rëndësishme. Si komision, së bashkë me drejtoreshën e administratës i kanë përgatitur njoftimet dhe ato t’ju shpërndahen qytetarëve për t’u njoftuar për zgjedhjen e këtyre këshillave.

Mentor Hasani, anëtar i kuvendit - propozoi z.Kushtrim Hysenin për anëtar të komisionit të ankesave lidhur me procesin e zgjedhjes së këshillave lokale.

Alban Bajrami, anëtar i kuvendit - propozoi znj.Edona Gashi për anëtare të komisionit të ankesave lidhur me procesin e zgjedhjes së këshillave lokale.

Sylejman Mehulli, anëtar i KK-së – tha se ky komision po formohet jashtë afatit ligjor që e parasheh rregullorja. Por, sido që të jetë, komisionit i uroi punë të mbarë dhe propozoi znj.Fatmire Cecelia për anëtare të këtij komisioni.

Kuvendi i komunës me shumicë votash themeloi komisionin e ankesave lidhur me procesin e zgjedhjes së këshillave lokale, në këtë përbërje: Kushtrim Hyseni, Edona Gashi dhe Fatmire Cecelia.

1. Me këtë vendim formohet komisioni për shqyrtimin e ankesave lidhur me procesin e zgjedhjes së Këshillave Lokale në Komunën e Vushtrrisë, në përbërjen si në vijim:

1.1.Kushtrim Hyseni, anëtar i kuvendit (PDK);

1.2.Edona Gashi, anëtare e kuvendit (LDK);

1.3.Fatmire Cecelia, anëtare e kuvendit (LVV).

2. Komisioni i ankesave i cekur në pikën 1 të këtij vendimi, është i obliguar që t’i shqyrtojë të gjitha ankesat dhe brenda afatit të përcaktuar ligjor duhet të kthejë përgjigje me shkrim atyre që kanë adresuar ankesën, lidhur me parregullsitë eventuale që janë shkaktuar gjatë procesit të zgjedhjes së këshillave lokale në Komunën e Vushtrrisë.

3. Vendimet e komisionit të ankesave janë përfundimtare në procedurën administrative dhe të obligueshme për palët.

4. Për punën e tij komisioni i raporton Kuvendit të komunës, ndërsa për funksionimin e tij komisioni zgjedh kryesuesin e tij nga radhët e veta.

5. Për zbatimin e këtij vendimi obligohen anëtarët e komisionit të cekur në pikën një (1) të këtij vendimi.

6. Ky vendim hyn në fuqi shtatë (7) ditë pas publikimit në faqen zyrtare të Komunës së Vushtrrisë.

10. Shqyrtimi i Propozim – vendimit për formimin e komisionit për hartimin e rregullores për komitetet e kuvendit.

Nurie Halili, anëtare e kuvendit - propozoi z.Ilmi Azemi për anëtar të komisionit për hartimin e rregullores për komitetet e kuvendit, nga radhët e PDK-së.

Edona Gashi, anëtare e kuvendit- në emër të grupit kuvendar të LDK-së propozoi Shkelzen Xhaferin për anëtar të këtij komisioni.

Ymer Haradinaj, anëtar i kuvendit- në emër të grupit kuvendar të LVV-së propozoi Sylejman Mehollin për anëtar të këtij komisioni.

Kuvendi i komunës me shumicë votash themeloi komisionin për hartimin e Rregullores për komitetet e kuvendit, në këtë përbërje: Ilmi Azemi, Shkelzen Xhaferi, Sylejman Meholli, Ismet Gashi dhe Bastri Duraku.

1. Me këtë vendim formohet komisioni për hartimin e Rregullores për funksionimin e komiteteve dhe komisioneve të Kuvendit të Komunës së Vushtrrisë në përbërjen si në vijim:

- 1.1. **Ilmi Azemi, anëtar i kuvendit (PDK);**
- 1.2. **Shkelzen Xhaferi, anëtar i kuvendit (LDK);**
- 1.3. **Sylejman Meholli, anëtar i kuvendit (LVV);**
- 1.4. **Ismet Gashi, nga zyra ligjore e komunës dhe**
- 1.5. **Bastri Duraku, nga sekretaria e kuvendit.**

2. Komisioni i cekur në pikën një (1) të këtij vendimi, do të hartojë draftin e kësaj rregulloreje dhe të njëjtën do ta procedojë në kuvend për aprovim.

3. Për zbatimin e këtij vendimi obligohen anëtarët e komisionit të cekur në pikën një (1) të këtij vendimi.

4. Ky vendim hyn në fuqi shtatë (7) ditë pas publikimit në faqen zyrtare të Komunës së Vushtrrisë.

Mbledhja përfundoi në ora: 15:10.

Bastri Duraku



Procesmbajtës

Melihatë Basholli-Latifi



Kryesuese e Kuvendit

